

ԱԶԳԱԳՐԱԿԱՆ ԱԿՆԱՐԿ ՆՈՐ ՇԱՂԱՏԻՑ

ԽՈՐԷՆ ԳՐԻԳՈՐԵԱՆ
xorenbask86@gmail.com

Շաղատը Սիւնիքի հին ու հարուստ կենսագրութիւն ունեցող բնակավայրերից է, որի տարեգրութիւնը անխզելիօրէն կապուած է Սիւնեաց պատմութեան հետ եւ կազմում նրա մի մասը: Շաղատ կամ Շաղաթ, երկու տարբերակներն էլ գործածելի են, երկուսն էլ ճիշտ են համարուած: առաւել գործածելի է Շաղատ տարբերակը¹: Շաղատի մասին առաջին տեղեկութիւնները գալիս են Ք.ա. Գ. հազարամեակից: Սիսակ Նահապետի ժամանակներից սկսած Շաղատը եղել է պատմական Սիւնիքի ամենակարեւոր եւ ամենահարուստ Ծղուկ Գաւառի գահանիստ քաղաքը: Այդ մասին է վկայում Երուսանդ Լալայեանը. «Եղել է գահանիստ քաղաք, բայց այժմ մի հասարակ գիւղ է եւ գտնուում է մի թերակղզային հարթութեան վրայ: Նրա հիւսիսային կողմից հոսում է Որոտան (Բազարչայ) գետը, որի հետ խառնուելով արեւմուտ-հիւսիսից հոսող վտակը՝ Ապարանց (Ալիքլու), անցնում է դէպի արեւելք, մինչեւ Բերդաք սարը, ու նրա հետ խառնուում է Մազրա (Մթոր) գետը»²: Մինչեւ Ք.ե. ժ. դարը Ծղուկը եղել է Սիւնեաց աշխարհի վարչական եւ հոգեւոր կենտրոնը Շաղատ բերդաքաղաքով³, ինչի պատճառով էլ Շաղատը յաճախակի յիշատակուած է մատենագիրների որոշ նիւթերում: Դ. դարի վերջից մինչեւ Թ. դարի առաջին կէսը Շաղատում էին գտնուած Սիւնեաց եպիսկոպոսարանը եւ հոգեւոր դպրոցը: Մօրուս Հասրաթեանն իր Պատմահնագիտական Ուսումնասիրութիւններ աշխատութեան մէջ նշում է. «Ամէն դէպքում կասկածից վեր է, որ Շաղատը, աթոռանիստ լինելով հանդերձ, մշտապէս մնացել է Հայաստան երկրի նշանաւոր բնակավայրերից մէկը»⁴: Մինչեւ Դ. դարը Շաղատի կազմաւորման, անուանակոչման վերաբերեալ տեղեկութիւնները կցկտուր են: Այն կարծիքը կայ, որ Շաղատ անուանումը ծագել է շաղի հատիկ կամ շաղառատ բառերից:

Ժամանակակից Շաղատ գիւղը գտնուած է Սիւնիքի Մարզում: Այն նոր գիւղ է եւ գտնուած է պատմական Շաղատից (Շուքար⁵) մօտ 2-3 կլմ. արեւելք: Հին Շաղատից համարեա ոչինչ չի պահպանուել: Գիւղի բնակիչները հին բնակավայրից տեղափոխուել են տարեբայօրէն, իսկ վերջին շրջանում՝ դարաբաղեան հակամարտութեան տարիներին, հին Շաղատը ամբողջովին դատարկուել է, իսկ բնակավայրում առկայ բոլոր շինութիւնները հանդիսացել են շինանիւթ՝ նոր բնակավայրի կառուցման գործում⁶: Նոր կառուցուած բնակավայրը հիմնականում հարթավայրային տիպի է: տները կառուցուած են շարքերով: Բնակավայրը բաղկացած է միայակ եւ երկյարկ տներից, որոնք ունեն կից կառուցուած գոմեր, այգիներ: Տները հիմնականում տուֆակերտ են, ուղղանկիւն, քառաթեք տանիքով: Սրանք բաղկացած են մի քանի սենեակներից, իսկ ներքին կահաւորանքով եւ յարմարաւէտութիւններով չեն զիջում քաղաքային բնակարաններին⁷: Բնակելի տունը, գոմը (կյոմ), տնամերձ հողատարածքը (բախչա) կազմում են մի ամբողջ տնտեսվարման համալիր⁸: Խոտի դէզերը (տեգ) կամ գոմերի հարթ տանիքներում են, կամ էլ յարակից

չինուլթիւն է կառուցուած այդ նպատակով (խոտանոց): Որոշ տները կից այգիները հասնում են մինչեւ մի քանի հազար քառ. մետրի:

Կայ նաեւ հինգ յարկ ունեցող բնակարանային կառույց, որը խորհրդային վերջին տարիներին է կառուցուել: Այստեղ հիմնականում բնակւում են Սիսիան քաղաքից Շաղատ տեղափոխուած ուսուցիչներ, եւ այլ մասնագիտութեան տէր անձինք: Այս շէնքում բնակւում են նաեւ շաղատեցիներ: Այս գիւղական բնակավայրում հիմնականում զբաղւում են հացահատիկային մշակութիւնների՝ ցորենի, գարու եւ գետնախնձորի (կարտոֆիլ) մշակմամբ: Հացահատիկն աղում են տեղում, հացն էլ տանն են թխում՝ հիմնականում ժամանակակից էլեկտրական վառարաններում⁹: Եղանակի խիստ լինելու պատճառով անասնապահութեան մէջ հիմնականում ոչխարաբուծութիւնն է զարգացած, խոշոր եղջերաւորները մեծ թիւ չեն կազմում, իսկ արօտավայրերը գտնւում են բնակավայրի դիմացի լեռնալանջային բարձունքի վրայ: Կան «ուներոր» տնտեսութիւններ, որոնք պահում են հարիւրից աւել ոչխար եւ վարձում են հովիւ (չոբան), որը միայն իրենց ոչխարների հոտն է (սիւրու) արօտավայրեր տանում: Այս չոբանների կանայք կամ մայրերն էլ զբաղւում են այդ տնտեսութիւններում այգեգործութեամբ եւ այլ տնային գործերով: Օժանդակ զբաղմունքներից տարածուած է մեղուաբուծութիւնը: Սակայն մեղուաբուծութեամբ զբաղւում են առաւել «ուներոր» տնտեսութիւնները:

Շաղատում կան Խոյից, Սալմաստից գաղթածներ: Դա Լալայեանի մօտ այլ կերպ է մեկնաբանուած: Բանն այն է, որ Լալայեանը նշում է, որ այս գիւղերի՝ մասնաւորապէս Շաղատի, Բալաքի, Անգեղակոթի բնակիչները գաղթել են Խոյից, Սալմաստից. «Բնակիչները 1829 թուին Պարսկաստանի Մարաղայից, Խոյից, Սալմաստից գաղթած հայ լուսաւորչականներ են, ընդամենը 626 տուն (1217 հոգի)»¹⁰: Սակայն հետաքրքրական է այն, որ մեր հետ զրոյցի ժամանակ բնակիչներից ոմանք, որոնք շաղատեցի էին, նշում էին, որ մեծ թիւով բնակիչներ եկել են Պարսկաստանից դեռ շատ վաղուց, ոմանք Անդրանիկ Օզանեանի Պարսկաստանից վերադառնալիս են միացել նրան, ոմանք էլ 1940-ականներին հայրենադարձութեան ժամանակ են եկել: Հարց է ծագում, իսկ ովքեր են իրենք, պարզ է, որ մեզ այդ մասին պատմողները՝ ովքեր գիտեն իրենց համագիւղացի խոյեցիներին ու սալմաստցիներին, բնիկներ են: Չնայած այս հարցը առաւել մանրամասն հետազօտութեան կարիք ունի, քանի որ այն վերաբերում է Սիսիանի մի շարք այլ բնակավայրերի եւս, որոնք Լալայեանի կողմից նոյնպէս նշուած են, որպէս Սալմաստից ու Խոյից գաղթածների վերաբնակեցուածների տարածքներ¹¹: 1990-ականների վերջում գիւղատնտեսութեամբ զբաղուելու նպատակով այստեղ են տեղափոխուել Սիսիան քաղաքից մօտ 10 ընտանիք, որոնք այժմ էլ բնակւում են Շաղատում: Եկել են նաեւ այնպիսի ընտանիքներ, որոնք անկախութեան առաջին տարիներին բնակութեան նպատակով տեղափոխուել են Սիսիան, Երեւան: Որոշ ընտանիքներ էլ բնակութիւն են հաստատել Ռուսաստանում:

Եկեղեցու բակի գերեզմանատունը հանդիսացել է «գիւղում անունով մարդկանց» յուղարկաւորելու գերեզմանատուն¹²: Բացի հոգեւորականներից այստեղ են թաղուած աշխարհիկ անձինք, որոնք այս կամ այն կերպ հեղինակութիւն են եղել այս գիւղում¹³: Անձնական ազգագրական դիտարկումներից ելնելով՝ կարող եմ հաստատել, որ Շաղատում հեղինակութիւն էին համարւում

մարդիկ, ովքեր կարողացել էին «ճյարթել» թուրքերին: Ասենք. «Գուրգեն պապը քինացել էր որսի, էրկու թուրքի ասկանց էր պերտ»:

Բնակավայրի կարեւոր կառույցներից յայտնի է դպրոցը¹⁴: Գիւղի կենտրոնական հատուածում՝ բլրի վրայ գտնուում է ակումբը, որը հանդիսանում է ժամանակակից հաւաքատեղի¹⁵: Հետաքրքրական է այս փաստը առաւել մանրամասնորէն ուսումնասիրել, քանի որ ԺԹ. դարում եւ մինչեւ Ի. դարի սկիզբը գիւղական բնակավայրերում որպէս հաւաքատեղի էր ընկալուում գիւղի կենտրոնում գտնուող եկեղեցու բակը, կամ մի խոշոր ծառ, որը նոյնպէս գիւղի կենտրոնում էր ընկած: Այստեղ տղամարդիկ հաւաքուել են գիւղի հոգսերից, բերքի առատութիւնից, երաշտից կամ ուղղակի գրուցելու համար: Խորհրդային տարիներին բացառապէս բոլոր գիւղերում բացուեցին ակումբներ, որի տեղի ընտրութիւնը հիմնականում գիւղի կենտրոնն էր հանդիսանում: Անքննարկելի է նաեւ այն, որ այս որոշումը հենց կապուած էր վերելում նշուած հանգամանքի հետ. գիւղի բնակիչները հաւաքուում էին գիւղի կենտրոնում, մնում էր շինութիւն, որպէսզի այդ հաւաքատեղին այնտեղ լինի: Քանի որ այժմ էլ, որպէս հաւաքատեղի հանդէս է գալիս ոչ թէ ակումբը, այլ «կրլուբի մօտը», ապա դա եւս իր մէջ կարեւոր մի փաստ է պարունակում: Բնակչութիւնը որպէս բոլորին ծանօթ վայր ընտրում է գիւղի կենտրոնում առկայ «կրլուբ»ը, սակայն, ինչպէս եւ խորհրդային կարգերից առաջ, նրանք հաւաքուում են ոչ թէ «կրլուբում», այլ դրա մօտ գտնուող «ծառի քոբի» կամ մօտակայ «ախպրի» շրջանում¹⁶:

Ղարաբաղեան պատերազմի տարիներին զոհուած ազատամարտիկներին նուիրուած յուշակոթողը իւրովի մի ուխտատեղի է: Այստեղ գիւղի բնակչութիւնը հաւաքուում է բոլոր կարեւոր արարողութիւնների ժամանակ՝ յիշելու եւ յարգելու յանուն հայրենիքի իրենց կեանքը զոհած հայորդիներին յիշատակը: Նոյնիսկ հարսանիքների ժամանակ հարսն ու փեսան այստեղ են գալիս՝ իրենց երախտագիտութիւնը յայտնելու հայրենիքի անձնագոհ մարտիկներին. եկեղեցուց դուրս գալուց յետոյ հարսն ու փեսան մօտենում են զոհուածների շիրիմներին, խոնարհուում՝ դնելով ամէն մէկի շիրիմին մէկական ծաղիկ: Այդ բանը նկատելի էր նաեւ Սիսիան քաղաքի զոհուած ազատամարտիկների պանթէոնում. նոյնպէս եկեղեցուց դուրս գալով՝ հարսն ու փեսան, քաւորը, քաւորիկները, «ազաբ բաշին» եւ հարսնաքոյրը անպայման, իսկ մնացած հարսանքաւորները ըստ ցանկութեան, ծաղիկներ են դնում զոհուած ազատամարտիկների շիրիմներին:

Գիւղի ծայրամասում՝ առաւել մօտիկ հին բնակավայրի աւերակներին, պահպանուել եւ ապա վերանորոգուել է Ս. Գէորգ եկեղեցին: Ըստ Լալայեանի այս մէկը կառուցուել է հին եկեղեցու տեղում: Շաղատի առաջին եկեղեցու կործանման մասին տեղեկութիւններ չկան, սակայն պարզ է, որ մինչեւ ԺԴ. դար Շաղատը գիւղաքաղաք էր, մեծ բնակավայր, ուստի չէր կարող եկեղեցի չունենալ¹⁷: Դրա մասին է վկայում Ստեփանոս Օրբելեանը. «Եկեղեցի քարակոփ չքնաղաչէն, որ ոչ ուրէք էր այնպիսի հրաշաքարտար»¹⁸ շինուած, գմբէթն եւ խորանքն չորեքկուսի, մի յարկ, մի տանիք եւ ոչ ուրոյն, ուրոյն որպէս եւ այլ զաղատուաչէն¹⁹ եկեղեցիք»²⁰: Եկեղեցին արտաքնապէս գեղեցիկ է, սակայն աւելի գեղեցիկ է ներսը, որը կառուցուած է բարդ ճարտարապետական ոճով,

կամարակապ սիւներով: Ունի ընդարձակ ճեմասրահ եւ վեր բարձրացող խորաններ:

Եկեղեցու անմիջական հարեւանութեամբ գտնուում է նաեւ ձիթհանը, որը կարծես ժառանգութիւն է մնացել հին բնակավայրից: Յատկանշական է այն, որ հին գիւղում առկայ ձիթհանը գիւղի բնակիչների կողմից սրբորէն պահպանուել է: Ձիթհանը սկզբնական շրջանում եղել է մասնաւոր սեփականութիւն, չնայած կան կարծիքներ, որ այն նախկինում եղել է վանքապատկան, ապա յետագայում է մասնաւորացուել: Դրա վառ ապացոյցն է այն, որ ձիթհանը գտնուում է բնակավայրում առկայ եկեղեցու կողքին, կարելի է ասել նոյնիսկ եկեղեցու տարածքում: Այժմ մի փոքր արահետով է ձիթհանը անջատուած եկեղեցուց: Այն խորհրդային տարիներին նաեւ եկեղեցու չգործելու պայմաններում դարձել է գիւղի սեփականութիւն եւ ծառայել մինչեւ վերջին տարիները Շաղատին եւ շրջակայ գիւղերի բնակչութեանը: Երկրով մասնագիտական գրականութեան մէջ առկայ հարուստ նիւթերից՝ պէտք է հաստատել, որ Շաղատի ձիթհանը առաջին տիպի է եւ կառուցուածքաբանական տեսակով՝ երկսրահ²¹: Ընդհանրապէս միայն Սիւնիքում եւ Արցախում է, որ ձիթհանը բաժանուել է երկու սրահի, որոնք միանում էին ներքին դռնով: Անկախ այն բանից՝ ձիթհանը միասրահ է, թէ երկսրահ, դրանում տարբերակուում էին երկու հիմնական եւ մի քանի օժանդակ արտադրամասեր: Կարելի է նաեւ նշել, որ հիմնական արտադրամասերն էին կալատունը եւ ձիթատունը²²: Ձիթհանը միայնակ կառույց է՝ բաղկացած մուտքից եւ երկու փոքր պատուհաններից: Ճակատային պատի վրայ խոյաքանդակ կայ: Տանիքը, չնայած պահպանուած չէ, սակայն տեսանելի է, որ այն փայտից է եղել եւ կանգնած է եղել ներսոյթից բարձրացուած չորս սիւների վրայ²³: Ձիթհանը եղել է բնակավայրի առաջին արտադրամասը եւ ունեցել է իւրօրինակ արտադրանքայիններ: Կտաւատը բովում էին եւ լցնում մեծ կալի մէջ: Գոմէշը (եզը, ցուլը) լծուում էր քարին, քարը պտտուում էր՝ կտաւատը դարձնում փոխինձ: Փոխինձը լցուում էր կաղը²⁴ եւ ճզմուում: Առաջանում էր ձէթ եւ քուսպ: Պատրաստի ձէթը բաժանուում էր ըստ տնտեսութիւնների: Քուսպը մնացորդն էր, որը օգտագործուել է որպէս անասնակեր: Յատկանշական է, որ ամբողջ համայնքի բնակչութիւնը պէտք է մասնակցութիւն ունենար ձէթի պատրաստման ամբողջ գործընթացին: Ձիթհանը գործել է մինչեւ 1990: Տարբեր ժամանակներում ձիթհանի վարպետներն են եղել Հաթոյենց Դաւիթը, Թունենց Լազրը, Խոյենց Աւետիսը եւ Խաչոյենց Լեւոնը²⁵: Այսինքն, եթէ վերցնենք այն փաստը, որ նշուած վարպետներից իւրաքանչիւրը առնուազն 30 տարի որպէս վարպետ աշխատել է ձիթհանում, ապա կարելի է ենթադրել, որ ձիթհանը առնուազն 1870ականների կառույց է, չբացառելով նաեւ որ չեն պահպանուել աւելի առաջ գործած վարպետների անունները²⁶:

Տեղեկութիւններ կան նաեւ գորգագործութեան, քարագործութեան, կաւագործութեան մասին: Գիւղացիների պնդմամբ գիւղում եղել է նաեւ դարբնոց, նոյնիսկ վերջին դարբինի անունը յիշում էին (ուստա Եղիշ), սակայն այդ դարբնոցի տեղը յստակ չեն յիշում:

Ձիթհանի պատին կից գտնուում էր Խաչոյենց Լեւոնի բնակարանը: Այն հասարակ, միայնակնի տուն էր, իսկ բնակարանի հենց գլխաւոր սենեակում մի շարք նախնիների լուսանկարներ էին փակցուած, որը նախնիների

պաշտամունքի վերապրուկի ինքնատիպ դրսևորում է²⁷: Դրան կարելի է անդրադառնալ այն տեսանկյունից, որ լուսանկարները կախուած էին հերթականութեամբ. ամենահինից (նոյնիսկ 100 տարուայ հնութիւն ունեցող) մինչ վերջին ժամանակները: Դա կրկնուած է այս բնակավայրի այն տներում, որոնք վերջին շրջանում չեն վերանորոգուել: Դրան կարելի է աւելացնել մէկ այլ փաստ եւս: Եւգենիա Գէորգեանի հետ զրուցելիս, նա բերեց այլոս եւ սկսեց նշել այնտեղ առկայ նկարների անձանց. դրանք նրա հօր պապի, պապի, հօրեղբօր, հօր լուսանկարներն էին: Այս մարդկանց անունները ամէնօրեայ յիշատակութիւն ունեն նրանց տներում, յիշում են նրանց խօսքերը, խորհուրդները: Օրինակ՝ «Գէորգ ամիս սեց կ'ասէր...»²⁸: Այս Գէորգ ամին 81 տարեկան Եւգենիա Գէորգեանի հօր հօրեղբայրն էր: Նոյնիսկ այս մարդիկ այնքան են յիշում իրենց ազգակիցների տներում, որ թւում է՝ հիմա կարող է դուռը բացուել եւ նրանք ներս կը մտնեն: Ըստ իմ ազգագրական դիտարկումների՝ այս բնակավայրում նախնիներին յիշում են ներկայ ժամանակով, իսկ նրանց խօսքերը նոյնիսկ փոքրերն են կրկնում²⁹:

Այս խնդիրներից բացի Շաղատը ունի հետաքրքիր պատմութիւններ կապուած ինչ որ մարդկանց կամ ինչ որ իրադարձութիւնների հետ, որոնք ժամանակի հետ վերածուել են առասպելների: Առաւել յիշարժան են Շաղատից 3 կլմ. դէպի արեւելք ընկած Սուրբ Վարդան Զօրավար վայրին վերաբերող պատմութիւնները: Սուրբ Վարդանի անունով սրբատեղիները, մատուռները բազմաթիւ են: Դրանցից մէկն էլ գտնուում է Այափարս գիւղում³⁰: Այս մասին առաւել մանրամասն անդրադառնում է Հասրաթեանը, նշելով, թէ Անգեղակոթից կէս կլմ. դէպի Նախիջեւան տանող ճանապարհի եզրին, Շաղատի դիմացի ժայռերի տակ գտնուող «Վարդան գօրաւոր» կոչուող ուխտատեղիում մնացել է բազմիցս վերաշինուած մի եկեղեցի, որի շրջապատում եւ փոքրիկ դաւթում ընկած են բազմաթիւ գերեզմանաքար-խաչքարեր: Այս վայրը դարեր շարունակ եղել է ուխտատեղի եւ ճանաչուել որպէս այդպիսին նաեւ սիսիանցիների համար եւ ճանաչուել որպէս Վարդան Մամիկոնեանի գերեզման³¹: Այստեղից էլ կարելի է ենթադրել, որ հենց այս սրբատեղիի հետ կապուած առասպելները հիմնականում կապուած են Վարդան Մամիկոնեանին սուրբ ընկալելու հետ, քանի որ տարով Վարդանի անունը՝ տարբեր հիւանդութիւններ էին բժշկուում³²: Այս սրբատեղիի հետ կայ մէկ այլ առասպելապատում, ըստ որի գիւղացի Մրդօն իր տան կառուցման ժամանակ ցանկանում է տանը յարմարացնել Սուրբ Վարդանի մատուռի դուռը, եւ երբ դուռը մէջքին առած բերում է տան առաջ, ոչ մի կերպ չի կարողանում այն իջեցնել մէջքից. դուռը չի պոկուում մէջքից: Միայն գիւղացիների յորդորներից յետոյ, Մրդօն դուռը ետ է տանում մատուռ եւ տեղադրում իր տեղը: Այդ իրադարձութիւնից յետոյ մատուռի դուռն անուեն է՝ Մրդոյի դուռ: Մի քանի անգամ այն փոխուել է, հիմա համեմատաբար նոր դուռ է, սակայն անունը պահպանուել է նախկինը՝ Մրդոյի դուռ, որը նոյնպէս սրբացուել է գիւղի բնակիչների կողմից: Այստեղ մի շարք արարողութիւններ են կատարուում³³: Այսպիսի սրբատեղերի առաջ գալը տարածուած է եղել ամբողջ Հայաստանում: Լալայեանի նիւթերում դրանցից նշում է Բղդէի վանքը: Բղդէն դամբարանների վրայից մի մեծ սալ է տանում՝ գոմը սալադասակելու համար: Մտատանջուելով, որ սա սրբի վրայից է վերցրել՝ հիւանդանում է, միառժամանակ յետոյ նրա որդին մահանում է:

Ենթադրելով, որ այս ամէնը դամբարանի սայլը տեղափոխելուց է՝ սայլը ետ է տանում իր տեղը եւ վրան մատուռ կառուցում: Այս մատուռն էլ նրա անուամբ կոչուել է Բղդէի վանք³⁴:

Հետաքրքիր յիշողութիւններ են պահպանուել Սաթօ բաջիի մասին: Սաթօ բաջին Բարձրաւան գիւղից է եղել: Ըստ ականդագրոյցի նա սուրբ կոյսի հեղինակութիւն է ունեցել Բարձրաւան, Շաղատ, Անգեղակոթ գիւղերում: Այստեղ յատկանշական ենք համարում Եւգօ տատի խօսքերը. «Սաթօ բաջին սիվթակ դերեայով աղչիկ-կնիկ էր»: Հետաքրքրական է այն, որ Սաթօ բաջիի մասին ով յիշում էր՝ նշում էր նրա սպիտակ շորերը եւ անպայման նշում էին՝ «աղչիկ-կնիկ» լինելը (այդպէս են անուանել չամուսնացածներին)³⁵: Սաթօ բաջին այնքան է սիրուել ու սրբացուել տեղացիների կողմից, որ մինչեւ օրս նրա նկարները, որպէս սրբապատկեր պահուում են այս երեք գիւղերի բնակիչների տներում: Այս կիմն ըստ բնակիչների «բուժողի, իմաստունի» համբաւ է ունեցել:

Շաղատ գիւղի մօտ Քեշաբերդի Սարից հարաւ բարձրանում է Ճգնաւորի սարը: Շաղատում որպէս սրբատեղի է ընկալուում նաեւ այս սարը³⁶: Այս բարձունքի մասին յիշատակութիւններ ունեն Լալայեանը եւ Ստեփան Լիսիցեանը³⁷: Սակայն ի տարբերութիւն Լալայեանի եւ Լիսիցեանի, որոնք գտնում են, որ պաշտուում է լեռան գագաթին գտնուող ժայռակտորը, որը մարդկային ձեռքի տեսք ունի, իմ կարծիքով, պաշտուել եւ պաշտուում է մի ճգնաւոր, որը ժամանակին բնակուել է այս լեռան քարայրում: Մեր պնդմանը կարելի է աւելացնել նաեւ այն փաստարկը, որ լեռան անունը հենց Ճգնաւոր է, իսկ հակառակ դէպքում կը լինէր մէկ այլ անուանում կապուած ժայռի տեսքի հետ: Դրա հետ մէկտեղ պէտք է հաւաստել, որ Ճգնաւոր անունով լեռներ շատ կան հայկական տարածքում: Անհրաժեշտ է նշել նաեւ Ղեւոնդ Ալիշանի տարբերակը՝ լեռների պաշտամունքի առնչութեամբ. «Յիշատակներից յայտնապէս գուշակելի է, որ լեռներից մասնակի պաշտամունք կամ պատկառանք էր տարածուել քարայրերի եւ քարերի նկատմամբ վերջիններիս մեծութեան կամ այլանդակ ձեւերի պատճառով»³⁸: Եթէ ընդունենք Ալիշանի մեկնաբանութիւնը, իրօք՝ Ճգնաւորի տեսքը հենց իր ներկայացրած «այլանդակ» ձեւից է, որից ելնելով էլ երեւի պաշտուել է: Այնուամենայնիւ, մենք ներկայացնում ենք երկու տարբերակն էլ՝ պաշտուել է լեռը կամ պաշտուել է այնտող ապրող մի Ճգնաւոր: Ըստ բնակիչների՝ այս ճգնաւորը մտել է լեռան քարայրը եւ երգուել՝ ճգնել այնքան ժամանակ մինչ ժողովրդի վիճակը բարելաւուի: Այս պատումը նման է Սասնայ Ծռեր դիւցազնավէպի Մհերի դուռ կոչուող վայրին վերաբերող առասպելապատմանը. «Միերը հոն է. Ծանա քարի ցերսը, Միերի դուռը կը բացուի այն օրը Միեր կ'ազատի եւ դուրս կ'ելնէ եւ աշխարհ կ'աւերէ ու նոր ու արդար ուրիշ աշխարհ մը կը շինէ»³⁹:

Գիւղի բնակիչներն ամէն օր գնացել են նրա որպիսութիւնը իմանալու եւ այսպէս՝ այնքան ժամանակ, մինչ սար բարձրանալը չդարձաւ սովորոյթ, եւ արդէն ամէն տօնի, առիթի կապակցութեամբ, տուեալ տօն, առիթ կազմակերպողը բարձրանում էր Ճգնաւորի Սար «ճգնաւոր»ին մասնակից դարձնելու ուրախութեանը: Ճգնաւորի Սար բարձրանում էին նաեւ աղօթելու, նրանից օգնութիւն խնդրելու ակնկալիքով: «Ըկնաւորըմը մատաղ արա ու օխտը ընտանիքի տուր, քյասիքներին էլ տուր մատաղից, որ Ըկնաւորը ընթումա»: Այստեղ կատարուել են անձրեւաբեր ծէսեր, որի մասին յիշատակում է նաեւ Լալայեանը:

նը⁴⁰: Յատկանշական է նաև այն, որ Ճգնաւորի Լեռան զօրութիւնը աւելին է գնահատուում, քան նոյն բնակավայրում առկայ Ս. Գէորգ Եկեղեցուն: Այս մտքին ենք յանդում, երևելով նրանից, որ գիւղացիները պատմում էին, որ դժբախտութեան, չարիքի ժամանակ, գնում են Ս. Գէորգ, իսկ եթէ դա չի օգնում բարձրանում են Ճգնաւորի Լեռը մատաղ անելու: Բացի դրանից նշում էին, որ «եթէ բարձրանաս Ծգնատրի սարը ինչ որ խնդրանքով, ապա նոյն խնդրանքով դիմես Ս. Գէորգ, ապա կրկնակի պատիժ է քեզ սպասում Ծգնատրի Սարից»: Այնուամենայնիւ պէտք է նշել, որ վերջին ժամանակներս Ճգնաւորի Հանդէպ Հաւատքը աւելի է մեծացել, վերականգնուել է սարի գազաթին գտնուող մատուռը եւ բացի տեղացիներից, Ճգնաւորի Սար են այցելում նաև այլ բնակավայրերից. ոմանք գրօսաշրջական հետաքրքրութիւններից դրդւողա՞ծ, ոմանք էլ մատաղ անելու նպատակով: Նմանատիպ մի օրինակի էլ Հանդիպեցինք Որոտնավանքում: Այստեղ էլ Որոտնավանքի շրջակայ գիւղերի՝ Ադիտու⁴¹, Վաղատնի գիւղերի բնակիչները, որպէս սրբատեղի էին ընկալում ամբողջ այն բլուրի տարածքը, որի վրայ կառուցուած էր հենց Որոտնավանքը: Նախ Որոտնավանք տանող արահետի ձախ կողմում կայ ծառ, որը եւս սուրբ նշանակութիւն ունի տեղացիների համար: Այս ծառի մօտ կատարուում են մատաղներ եւ այլ ծէսեր՝ վախի դէմ եւ պտղաբերութեան համար: Որոտնավանքի պահակի խօսքերով. «Անարդիկ եկեղեցին ընկալում են ոչ թէ քրիստոնէական հաւատքի մատուռ, այլ ժողովրդական հաւատալիք»: Ահա երևելով այս երկրորդ դիտարկումից կարելի է հաւաստել, որ բլուրների, ծառերի, ժայռերի պաշտամունքը, որպէս սրբատեղի, հայերի մէջ որոշ չափով պահպանուել է կամ մնացել է որպէս վերապրուելի: Կայ նաև մէկ այլ տարբերակ՝ ժողովրդական քրիստոնէութիւնը: Այս հարցն առաւել մեծ արժէք է ներկայացնում եւ առաւել մանրամասն ուսումնասիրման կարիք ունի:

Յիշատակելի է նաև այն, որ բացի Ամանորից, Սուրբ Ծննդից, այստեղ լայն տարածում ունի Ակլամարիի տօնը⁴²: Այդ օրը երեխաները պարկերով շրջում են տներով եւ պարկը նախկինում երդիկից, այժմ դռնից ներս գցելով ասում. «Ակլամարեմ, չակլամարեմ ձեր տունն ի՞նչ բերեմ»: Դա Սուրբ Սարգսի տօնն է, որը յայտնի է նաև Խըզրի օր անունով⁴³: Խըզրի տօնին անդրադարձել է նաև Լալայեանը՝ բերելով Խըզրի տօնի երգի մի օրինակ: Սակայն այժմ երեխաները պարկերը գցելով դռնից ներս՝ երգում են.

Խըզր Խըզր Խըզրա
 Խըզրի օրը Էսորա
 Ով տա զօրանա
 Ով չտա քյոռանա⁴⁴:

Դրանից յետոյ տան անդամները դուրս են գալիս եւ պատուիրում որ երեխաները իրենց տան յաջողութիւնների համար մի երգ կամ բանաստեղծութիւն արտասանեն, ապա նրանց պարկերը լցնում են աղանդերով (չամիչ, ընկոյգ, պնդուկ): Յատկանշական է, որ ամբողջ Սիւնիքում միայն Սիսիանի տարածքում է Ս. Սարգսի տօնը Խըզր անունով յայտնի եւ վերը նշուածն էլ միայն Սիսիանում են անում: Դրա մասին է վկայում նաև Լալայեանը⁴⁵:

Ընդհանրացնելով՝ կարելի է ասել, որ Շաղատը, հարուստ կենսագրութիւն եւ պատմութիւն, մշակոյթ ունեցող գիւղ է, եւ այնտեղ ապրող մարդկանց կեն-

ցաղը, սովորոյթները, պատմութիւնները նորովի գրառման, ուսումնասիրման եւ մեկնաբանման կարիք ունեն:

ԾԱՆՕԹԱԳՐՈՒԹԻՒՆՆԵՐ

¹ Հայաստանի Ազգային Ատլաս, Հտր. Բ, Երեւան, «Գէօդեգրայի Եւ Քարտէզագրութեան Կենտրոն» ՊՈԱԿ, 2009:

² Երուանդ Լալայեան, Ազգագրական Հանդէս, Գիրք 3. Սիսիան, Թիֆլիս, «Էսպերանսո», 1898, էջ 186:

³ Բերդաբաղաքը տեղադրուած է Շաղատի արեւելեան կողմում ընկած մի վայրում, որը յայտնի է Նարին Կալա անուամբ:

⁴ Մօրուս Հասարթեան, Պատմահնագիտական Ուսումնասիրութիւններ, Երեւան, ՀՍՍՀ ԳԱ Հրատ., 1985, էջ 136:

⁵ Շուկարը հարեւան գիւղ է, որից խորհրդային տարիներին գաղթել են Շաղատ. այժմ Շուկարի միայն աւերակներն են պահպանուել:

⁶ Ժամանակակից Շաղատի բնակեցումը հիմնականում կապուած է ԽՍՀՄ հետ. հին Շաղատը անյարմար էր՝ թէ՛ իբրեւ բնակատեղի եւ թէ՛ իբրեւ ճանապարհային ուղիների համար չըջակայ գիւղերի հետ կապի առումով:

⁷ A. Ter Sarkissians, “Sovremenniy Etnonatsionalniye Protsesi Na Sele,” *Sovremenniy Izmemeniya V Materialnoy Kulture Armianskogo Selskogo Naseleniya (Ժամանակակից փոփոխութիւնները հայկական գիւղական բնակչութեան նիւթական մշակոյթի մէջ Ժամանակակից էթնիկ-ազգային գործընթացները գիւղում)*, Մոսկուա, 1986, էջ 125:

⁸ Տնամերձ այգիները անուանում են «բախչա», բնակավայրից հեռու ընկած ցանքատարածքները՝ «դահա»: Դրանք երկուսն էլ պարսկերէնից փոխառութիւններ են:

⁹ Ռուսերէն Pechka - վառարան բառը այստեղ օգտագործուած է այսպէս՝ փէջ կամ փէչ:

¹⁰ Լալայեան, էջ 187:

¹¹ Նոյն, էջ 140-190:

¹² Սա բնութագրական է բոլոր հայկական բնակավայրերին, առաւել մանրամասն տե՛ս՝ E. S. Markarian, S. A. Arutyunov, *Kultura Jizneobespecheniia I Etnos (Կենսապահովման մշակոյթը եւ էթնոսը)*, Երեւան, ՀՍՍՀ ԳԱ Հրատ., 1983, էջ 121:

¹³ Խորէն Գրիգորեան, Դաշտային Ազգագրական Նիւթեր՝ այսուհետ ԴԱՆ:

¹⁴ Դպրոցը հարուստ կենսագրութիւն ունի. այն հիմնուել է 1970ականներին, սակայն դրանից առաջ էլ դպրոց եղել է. պատմողներից մէկը՝ Փնջիկ Գէորգեան, անընդհատ յիշատակում էր, որ չորրորդ դասարանը աւարտելուց յետոյ, ինքն ստանձնել է տարրական երեխաներին դասաւանդելու գործը: Ի հարկէ, սա 1940ականներին է վերաբերում:

¹⁵ A. Ter Sarkissians, “Sovremenniy Etnicheskiye Protsessei Oo Armian Nagorno Karabakha” *Etnicheskie I Kulturno-Bitovie Protsesi Na Kavkaze (էթնիկական եւ մշակութա-կենցաղային գործընթացները Կովկասում. Ժամանակակից էթնիկական գործընթացները Լեռնային Ղարաբաղի հայերի մասին)*, Մոսկուա, Nauka, 1978, էջ 70:

¹⁶ Գրիգորեան, ԴԱՆ, Սիսիան, Շաղատ, 2010 Հոկտեմբեր:

¹⁷ Տե՛ս՝ Բաբկէն Առաքելեան, Քաղաքները Եւ Արհեստները Հայաստանում IX-XIII դ., Երեւան, Հայկական ՍՍԻ ԳԱ Հրատ., 1958, էջ 91:

¹⁸ Հրաչայի շինութիւն:

¹⁹ Վարպետօրէն շինուած, կառուցուած:

²⁰ Ստեփանոս Օրբելեան, Սիւնիքի Պատմութիւն, թարգմանութիւնը, ներածութիւնը, ծանօթագրութիւնները՝ Ա. Ա. Աբրահամեանի, Երեւան, Հայկական ՍՍՀ ԳԱ Հրատ. 1986, էջ 250:

- ²¹ Սուրէն Հրոստեան, «Հայոց Զինվորական Մշակույթը», Հայ Ազգագրութիւն Եւ Բանահիւսուցիչ, Հտր. 23, Երեւան, ՀՀ ԳԱԱ «Գիտութիւն» 2007, էջ 30-31:
- ²² Նոյն, էջ 44:
- ²³ Գրիգորեան, ԴԱՆ, տեսանիւթ:
- ²⁴ Բանասացը «Կաղ» ասելով նկատի ունէր ծղոտէ կողովները:
- ²⁵ Գրիգորեան, ԴԱՆ:
- ²⁶ Խաչոյենց Լեւոնը, ով ձիթահանի վերջին վարպետն էր եւ մեզ պատմում էր ձիթահանի մասին, խօսքի մէջ նշեց, որ ամբողջ կեանքը աշխատացրել է ձիթահանը, որպէս բանուոր, ապա նաեւ վարպետ՝ աշխատելով մօտ 30 տարի:
- ²⁷ Նախնիների պաշտամունքի մասին առաւել մանրամասն տե՛ս՝ S.A.Tokarev, Ranniye Formii Religii (Կրօնների վաղագոյն ձեւերը), Մոսկուա, Nauka, 1964,1990, էջ 255:
- ²⁸ Գրիգորեան, ԴԱՆ:
- ²⁹ Պէտք է նշել, որ այստեղ մասնագծների, անցեալում տեղի ունեցած իրադարձութիւնների մասին խօսում են ներկայ ժամանակով:
- ³⁰ G. O. Karapetian, Doroga Mgera, Armaniye Legendei I Predanniye (Մհերի ճանապարհը. հայկական ականազարոյցները եւ ականդութիւնները), Մոսկուա, Nauka, 1990, էջ 148:
- ³¹ Հասարակեան, էջ 67:
- ³² Նոյն, էջ 70:
- ³³ Գրիգորեան, ԴԱՆ:
- ³⁴ Ե. Լալայեան, Ազգագրական Հանդէս, Գիրք XV, Թիֆլիս, Հերմէս, 1907, էջ 201:
- ³⁵ Սպիտակ գոյնի առնչութիւնների մասին առաւել մանրամասն տե՛ս՝ Արմէնուհի Ստեփանեան, «Հայ Տարագրի Զարդանախշերը (Միսային, Գունային Եւ Նշանային Համակարգեր)», Հայ Ազգագրութիւն Եւ Բանահիւսուցիչ, Հտր. 22, Երեւան, ՀՀ ԳԱԱ «Գիտութիւն», 2007, էջ 28-40:
- ³⁶ Սրբատեղիների մասին առաւել մանրամասն տե՛ս՝ Eliade Mircha, Ocherki Sravnitel'nogo Religiovedeniya (Ուրուագծեր համեմատական կրօնավարման), Մոսկուա, Nauchno-Izdatelskii tsentr Lodomir, Մոսկուա, 1999, էջ 253:
- ³⁷ Երուանդ Լալայեան, Միսիան, էջ 186. նաեւ՝ Ս. Լիսիցեան, Զանգեզուրի Հայերը, Երեւան, 1969, էջ 279:
- ³⁸ Ղ. Ալիշան, Հայոց Հին Հաւատքը Կամ Հեթանոսական Կրօնը, Երեւան, «Գրիգոր Տաթեւացի» ՄՊԸ, 2002, 22 էջ:
- ³⁹ Տիգրան Զինովի, Ազգապահպանման Մեծագոյն Ակնաղբիւրը, Սասունական (Հայ Ժողովրդական Դիւցազնավէպ), Պէյրութ, Տպ. Սեւան, 1960, էջ 159:
- ⁴⁰ Լալայեան, Միսիան, էջ 159:
- ⁴¹ Սա գիւղի նոր անունն է. Ժողովրդի մէջ աւելի մեծ տարածում ունի Աղուղի անունը, որը խորհրդային տարիներին բնակեցուած էր նաեւ աղբեղանցիներով: Խորհրդային Միութեան անկումից ու Սումգայիթեան ջարդերից յետոյ, այստեղի աղբեղանցիները իրենց տեղի բնակարանները փոխանակեցին Բաքուի, Սումգայիթի հայերի բնակարանների հետ:
- ⁴² Ակլամարի անունը տարածուած է միայն Շաղատ եւ Անգեղակոթ գիւղերում, Միսիանի մնացեալ բոլոր բնակավայրերում այս անունը յայտնի է իւրր անունով:
- ⁴³ Հրանուշ Խառատեան, Հայ Ժողովրդական Տօները, Հտր. 2, Երեւան, «Զանգակ», 2005, էջ 62:
- ⁴⁴ Գրիգորեան, ԴԱՆ:
- ⁴⁵ Երուանդ Լալայեան, Ազգագրական Հանդէս, Հտր. IV, Զանգեզուր, Թիֆլիս, Հերմէս, 1898, էջ 106:

ETHNOGRAPHIC NOTES FROM SHAGHAT
(Summary)

KHOREN GRIGORYAN
xorenbask86@gmail.com

After conducting extensive field research in the Syunik District, the author introduces to the public part of his findings pertaining to a village named Shaghat. Shaghat is one of the oldest settlements of the Syunik District, located in the southern region of the Republic of Armenia, close to Karabagh. Shaghat has a long and eventful history connected to the history of the Syunik District.

The author reports on the new location of the village, its inhabitants and their origins, the work they do, their socio-economic weave and certain traditions and customs.